

摘藻堂四庫全書薈要

集部

欽定四庫全書薈要

集部

端明集卷六

四至

詳校官助教臣常循



欽定四庫全書薈要卷一萬四千五百四

集部

端明集卷四

宋 蔡襄 撰

律詩

觀三聖御書應制

聖業存功德宸豪冠藝文勢開千里浪光動九天雲
法駕乘時至仙都與世分皇心欽寶訓求治益精勤

羣玉殿賜宴

有序

臣蒙恩宣召再至龍圖閣觀書羣玉殿曲宴伏以數

千年間無此盛事臣忝職翰墨榮遇非常謹賦拙詩
一首備載本末上干聖覽無任戰越之至

治道承炎歷皇基亘萬年深仁涵海嶽至德著坤乾文
物歸元首臣隣必巨賢蓼蕭思及下奕葉力追先昕色
方羣進臚音忽四傳衣冠紛雜遝臺殿鬱蟪蛄

嘉祐七年十二

月二十三日詔宰臣以下
龍圖天章閣觀三聖御書

寶字崇三聖瑤圖秘九天榮

河祥氣徹昭漢曉光旋磊砢珠璣在崢嶸歲月遷家聲

終卓越上意益恭虔書觀開鋪首

又幸寶文閣作飛白
字召臣寮觀人賜一

軸兼賜紙筆
墨各有差

宸毫落彩牋煙雲初不定鸞鳳互相鮮拜

賜兼金重珍藏尺璧全人人皆自得事事獨超前霄藻

敦風教

賜御詩一首令羣臣次韻和進

冥搜出化權來從玉山府遠過

栢梁篇迴馭臨高館

賜宴羣玉殿

推恩錫廣筵迷魂遊帝所

休應動星躔申命嚴樽俎

二十七日幸寶文閣召宰臣以下觀太宗游藝集瑞物十

三種仍賜御書宴羣玉殿宣諭太平無事令羣臣盡醉

新章被管絃十齡叨際會

曠古絕夤緣大施難論報精誠第祝延唯應歌盛美樂

石可磨鐫

上元進詩

有序

臣言臣伏觀法駕特御端門宣諭臣僚上元觀燈不
為遊賞蓋與民共樂也臣職在文字恭惟德音宣布
睿旨感詩人揄揚盛美之私輒成短章上千宸覽臣
無任惶恐戰越之至

疊聳青峰寶炬森端門初晚翠華臨宸遊不為三元夜
樂事全歸萬衆心天上清光開夜色人間和氣閣春陰
要知盡作華封祝四十年来惠愛深

夢中作

年十八時入京就進士
舉過舒州相城夢中作

白玉樓臺第一天琪花風靜彩鸞眠誰人得似秦臺女
吹徹雲簫上紫煙

久寓悟空院刹行而書之

寂寂精廬切半空古原高下稻花中蓮趺披素輕雲梵
花萼雕紅細雨宮孤鶴睡迷千樹月斷蟬吟繞五更風
心縻尺組遙相謝歸馬南蹄疾似蓬

漳南十詠

龍臺

試看初日照龍臺
白玉堂高錦障開
樹色一番連雨淨
溪光幾曲抱山來
雲歸深洞天形瘦
風落前村笛弄哀
擬結青樓遍題詠
思王何吝斗量才

城東水閣

亭上芳樽惜別人
亭前斜日欲歸輪
傷心定是丹楓樹
拂面空來紫陌塵
歲月暗驚山色古
愁情長與草芽新
何時此地迴飛蓋
寂寞欄干又一春

南溪

近郭溪光綠好裁
雨晴波底敞樓臺
蔭堤佳樹千圍合
掠水輕舟一箭開
驚釣寒魚拖糝去
忘機閒鳥信潮迴
官餘擬欲祛塵意
書遍平沙我獨來

滿月池亭

有客高懷脫世塵
碧灣晴檻樂遊頻
無心自合波中月
照影誰分鑑內人
莎砌亂蛙爭噪雨
杏梁雙燕欲留春
長年老厭趨豪末
來揖孤雲作上賓

西湖

湖上山光一笋青
佛宮高下裏
嵒局烟收水曲開
塵匣春送人家入
畫屏竹氣更清初
霽雨梅英猶細欲
殘星吳船越棹知
何處柳拂長堤月
滿汀

圓山廟

風雅遺芬嶽有神
此山靈祀越千春
彩毫佳句言猶在
翠剡新詞意未真
絕頂黑林長帶雨
曲崖飛磴不留塵
瘴雲收盡秋田熟
跋境肴漿再拜人

陳將軍廟

曾憑水柵誓長江報國全軀事不雙力屈已嗟關羽死
勢孤猶笑李陵降宿墳古劍龍腥匣壞壁靈旗獸纏扛
神理高高人意近楮錢祈福暗塵窓

白雲亭

雲擎輦檻翠嶺巔石老松皴不計年舉世覺來空白日
幾人遊去上青天醉看絕壑都無地嘯倚清風只恐仙
花晚春殘無限意他時迴首定依然

齊雲閣

紫閣青梯壓翠岑，春情秋思共登臨。
雨嵐供眼橫千掌，星漢垂簷直半尋。
忍別朱欄真俗吏，獨棲珍樹祇仙禽。
當年人事多奇尚，擬托巖扃息寸心。

東郊

苒惹晴雲釀雨時，東城無處不芳菲。
斜坡草短孤麕卧，平隴麥深雙雉飛。
炤鵑亂花驚客眼，罨空輕絮點郎衣。
年來意氣多羈束，無復長楸帶酒歸。

別宋判官

縷縷青陰拂去鞍
雨花狼籍顫春寒
年光別緒侵人鬢
莫向離亭子細看

城南春會

陰雲薄薄地無塵
清曉城南集畫輪
睢苑即時裁雪霰
潁川連夜聚星辰
山眉帖漢晴光擬
鶯舌尋風碎語真
芳草有情迷謝客
落花無處問秦人
樽前莫厭歌醒耳
世上偏饒淚滿巾
嘉意未闌繁盛減
東皇底事惜殘春

序賓亭

師律先憂寄朝家此得人門庭環劒佩宵膽貫星辰今
已閒戎略疇能卜宴申樓高休暇日臺迥厭登春珍館
瑤薨舉璇題寶篆新鴨欄迴鬪頸龍壁活盤鱗夾幕寒
波顛前峰古黛皴始知仙有路盡恐世無塵武馭來金
虎儒簪下石麟機分榮辱主解序去留賓揖讓盈三魄
雌雄競一神氣橫飛客箭歌協大夫蘋萬古浮雲片勞
生斷梗身即時懼未已往事夢非真席久疑枯海琴么

似隔隣缸花明雨暮甕耐壓霜晨鵲動殘絲柳鱸肥滑
線尊晴霞上丹葉熟粉護青筠賦景呵吟筆揮談密醉
茵流年祇容易嘉會可因循

望春詞

霏霏細雨勒梅黃一望春容十斷腸平蕪古柳青青遍
獨使潘郎兩鬢霜

落花

何事蒼苔數點紅曉來花片落春風可憐春色魚花盡

古今此情無處窮

耕園驛佛桑花

溪館初寒似早春
寒花相倚醉於人
可憐萬木彫零盡
獨見繁枝爛熳新
清艷夜霑雲表露
幽香時過轍中塵
名園不肯爭顏色的
天紅野水濱

溪行

秋氣已寥落
清溪纔此行
船移酒杯側
魚得鱸刀鳴
日色浮魚動
風痕滅又生
從知隱者趣
不獨傲榮名

淨衆院嘗荔支

霞樹珠林暑後新
直疑天意別留春
京華百世爭鮮貴
自是芳根着海濱

奉酬王知縣賞春不與以詩見贈

仙陬翠觀盡繁英
朱白相兼照眼明
池浸嵐光生晚碧
鳥驚人語斷春聲
談諧遽喜開懷久
骯髒終慙走筆成
佳致可能陶靖節
庭柯斜眄獨忘情

喜弟及第

里閉高高祖德新魯庭詩禮孟家隣連登桂籍青袍客
共拜萱堂白首親倚國精誠明火玉照人清節對霜筠
童襟開慧盈書館漸喜芝蘭在處春

西郊

曉蓋西郊道春光極

或作涵

太虛村風香晚稻溪日曝寒

魚雀噪飢鷹下山空病木踈歸期侵杪歲友思望吾廬

三月詣陳逋民

振衣凌曉色霽野縱遊韁莓潤溪雲重春深山露香林

幽風更細院靜日偏長曾是天皇外相從識酒鄉

次韻翠嵒寺

攬蔓嚴扃峻交繩寶界平斜峰約雲勢乾樹起秋聲泉
檻妨蛩響霜樓助月明冥筌魚洒落警句一何清

夏晚南墅

夏竹侍前楹涼襟折舊醒疊雲封日茜斜雨著虹明魚
動池開暈蟬移樹減清葭洲烟向暝鳬驚自相迎

蕪陰樓上

野馬沉寒氣神禽度細風斷霞天共紫斜日樹齊紅山口橫虛釣江隈跋遠艤解窮千里目爭奈思無窮

杪秋湖上

舊暑侵涼已分銷蕭疎丹樹見斜橋千千露竹全瀟灑一一風蟬共寂寥菰米熟汀來客燕莢絲分水避歸橈月魂未上東城角誰向東城與下招

和陳殿丞南州新詠

寶坊高閣遍憑欄曾是芳辰得未閒日上天容低接海

風輕湖底倒搖山夜深佛火寒星外春過人烟暗樹間
無意孤吟採幽致異時行橐斷空還

通源驛別顏茂才

躍馬東來不記時酒醒寒色入征衣垂楊官道連天去
落日郵亭別我歸

陪尹子漸申安禮宿香山寺

二月已強半尋春登石樓山光侵雨變草色到雲休歸
鳥沉崑際行人過樹頭剥苔看石碣因火認漁舟漸夜

灘聲惡憑虛屋勢浮乘閒聊自適觴詠屬吾流

正月四日

今朝纔見雪泥乾日薄雲低又作寒家山千里何時到
溪上梅花正好看

春曉

瞳瞳初日注窓明窓外鷓鴣乳燕聲東風氣味濃於酒
曉夢魔人似宿醒

晚色

晚色在何處樓高天宇低閒雲無去住歸燕自東西

過天津橋

日暖溪平冰漸銷水聲纔下內前橋山川滿眼閒宮殿
草樹迷人舊市朝每向尋春偏有意却成懷古更無聊
洛陽平昔多豪俊惆悵埋魂不可招

讀離騷經

莫恠靈均戀楚濱可能臣子外君親精心獨去珠無賴
飛語潛來箭有神宋玉招魂推意遠揚雄流涕掩書頻

江邊自是脩門路嗟苦先生隕此身

暮春登南門

麗譙高倚晚天霞滿目平臯盡物華
千曲胡笳催鼓荅三重湘酎倩旗誇
連江急雨送歸燕拂地輕風移落花
強凭欄干還自問此情何處是邊涯

和丘提刑寄湖南賈度支

何處多離感山郵霽野光
清吟貫騷雅遠意屬荆湘
霜樹呈秋色風蘭生晚香
使軺偏倚望摛藻寄回腸

和丘提刑聞新鴈寄賈度支

翔鴈來江渚秋容在遠空
幾聲疎樹外一字斷雲中
虛館垂簷月平臯敗葉風
裁詩託幽思幽思更無窮

遊龍門香山寺

彩閣縈林轉蒼崖隔水開
龕明千像日波起一灘雷
綠淺春前草香餘臘後梅
背人驚鷺去將雨好風來
雲氣隨衣袂嵐光入酒杯
清遊知不屢欲下更徘徊

聞福昌院春日一川花卉最盛

聞道春深多物華，遙憐春物思無涯。
烟涵樹色相依好，山擁溪流一帶斜。
休問主人先看竹，只隨漁叟便逢花。
憑誰畫得當時境，持去江南細與誇。

山前溪上最宜春，千樹夭桃一雨新。
爭得扁舟隨水去，亂花深處問秦人。

登府店福昌山閣

危磴通高閣，登臨境迥清。
雲開千岫出，雪霽一川明。
斷鴈來孤影，遙泉落細聲。
野烟依竹見，溪樹與橋平。
已助

騷人思空搖遠客情扁舟如可泛歷歷是江程

雪中不見女几山

宜陽南路是仙山雪擁雲埋杳靄間洗眼來看無處覓
不知可復在塵寰

登三鄉寺閣

歷覽宜陽道披軒臨朔風地疑塵世外在畫圖中巖
曲踈鍾荅村前小約通水烟寒更白山氣曉微紅遊宦
真浮梗流年似轉蓬長懷無所寄盡日送歸鴻

嵩陽道中

千里動秋意縈迴上古原山樵斲晚日野火著寒雲鍾磬出隣寺牛羊下遠村振衣歸去好塵事莫知聞

訪陳處士

橋畔脩篁下碧溪君家元在此橋西來時不似人間世日暖花香山鳥啼

題建造寺奉先院

日照溪山生翠光春深花草雜幽香登臨誰會遲留意

門外塵埃去路長

送別陳比部

祖帳西郊道川原盡閣臨燒痕經雨活樹色入溪深斜
日明春態孤雲感客心何人知別意重把酒盃斟

城西金明池小飲二首

曉出都門外名園連翠屏融怡春物動瀟灑塵慮醒輕
風送花信遠水涵空青舊遊無處問芳樹隔重局

城西禁籞宿煙收霜薄朝寒上罽裘佳樹得春生意動

平池受水翠光浮十年歌笑驚前世滿眼風花是舊遊
從此曲江芳物好定知重到更疑留

送張太傅還鄉

置器功成佚退身故園南望整車茵青冥直上無餘事
白首歸來有幾人門外離筵晴日曉江邊行路雜花春
橐金均散心如水冢樹重攀淚滿巾盃酒相逢耆舊少
山川不改歲華新從公几杖何由去更祝天年比大椿

寒食樂詞

皇州令節已藏烟帝渥乘時錫廣筵和氣去添春色重
恩光來助日華鮮千聲鳳吹朱門裏一番花香穀雨前
更喜簪裳嘉宴日親逢干羽治平年

喜歐陽永叔余安道王仲儀除諫官

御筆新除三諫官士民千口盡相歡昔時流落丹心在
自古忠賢得路難好竭謀猷居帝右直須風采動朝端
人生萬事皆塵土惟是功名永遠看

送楊殿丞通判睦州

蒼崖中斷一溪來迤邐人家向水開盡日烟雲迎旆去
滿瀧鏡吹引船迴虛齋晝夢鳴禽下別塢春遊畫角催
莫怪杜郎題處少更留佳致待清才

宿揚州

瓜州堰埭阻行橈更等江頭後信潮獨背殘燈數歸路
風傳寒柝夜迢迢

廣陵

廣陵歸路嘆飛蓬懷古傷離向此中前世翻波那復問

十年彈指已成空樓頭畫角催殘日城上寒鴉噪晚風
井徑蕭條人不見又隨潮信度江東

馬奴周晬思之因成

馬奴今日方周晬昨夜迢遙夢到家盤裏應知心所愛
尊前唯祝壽無涯呶嚶弄語群兒學踉蹌初行乳母誇
獨上揚州津館望江山搖落去鴻斜

聞鴈

霜風吹鴈入南雲千里征人枕上聞欲問梁園近消息

月沉星轉五更分

江頭別杜殿丞

揚子江頭南北路木蘭船上往來人
年華袞袞東流水
世事勞勞薄宦身回首天涯成遠別
忘懷物外自相親
津亭共起憂時嘆重記津亭淚滿巾

題金山寺

畫梁詩板暗流塵水石魚龍萬句新
誰識高僧最深意
慈航長護過江人

端明集卷四

欽定四庫全書薈要卷一萬四千五百五

集部

端明集卷五

宋 蔡襄 撰

律詩

題僧希元禪隱堂

院在蘇州城中

遊錫遍他方歸休靜默堂孤吟時有得諸念若為忘
刪竹減庭翠煮茶生野香雲山莫騰誚心地本清涼

經錢塘故宮

廢苑蕪城裏故宮行人苑外問秋風當時歌舞何年盡

此意古今無處窮往事蕭條隨敗葉客情迢遞寄孤鴻
扁舟欲去更回首寒樹蒼蒼夕照東

經林逋舊居二首

脩竹無多宅一區先生曾此隱西湖詩言不喜書封禪

亦有餘書補世無

逋詩云茂陵異日求遺草猶喜曾無封禪書

山色凝嵐水色清山雲長與水雲平先生來舉持竿手
釣得人間亢俗名

離錢塘

迎潮小舸滿旗風
回首津亭暮靄中
惆悵今宵歸去夢
迢迢直到海門東

至睦州

一帶滄波兩面山
扁舟中去幾時還
浮生多半在離別
此意明知未肯閒

題杉溪驛二首

宵行避酷暑
山路乍縈迴
明月正相向
涼風時一來
幽林潛物恠
祕洞蓄雲雷
豈敢憚勞苦
畏途誠可猜

隘道臨深壑，俯闌千仞強。驚禽忽獨去，怪石偶成行。
月下芙蓉色，風前薝蔔香。反慙羣動息，幽意更徬徨。

宿延平津

鳴籟蕭森萬木聲，濃嵐環合亂峰青。
樓臺矗處雙溪會，雷電交時一劍靈。
曉市人煙披霧旭，夜潭漁火闌寒星。
畫屏曾指孤舟看，今日孤舟在畫屏。

呈沈子山

邈字子山時知福州

荷葉新詞天下工，玉人垂手倚秋風。
一聲清唱穿雲去，

斜月烘簾曲未終

六月閩溪荔子丹新秋猶喜薦雕盤自嗟千里歸程遠
不得繁枝雨後看

題福州釋迦院幽幽亭

有序

東陽沈子山前此十年為侯官縣政休乘間頗自娛
於登臨之適得院之東北隅地方數丈誅草茅而列
樹石時游哦於其所因命曰峻青臺今復為郡太守
其僧曰吾使君倘一來執事者可暴露乎並臺作亭

以除風雨子山至其下又名之曰幽幽亭邀予題榜
以揭之遂作詩以賦山川之美而序以紀其始焉

路盡得佳賞川原何淨明周圍地形壯灑落世塵清背
郭千峰起涵空一水橫風帆人共遠潮嶼歲重耕曉市
炊烟合孤菴汲道縈俯窺嵒鳥過微認野雲生香氣林
端出秋容物外呈表間幡弄影覺靜磬傳聲官舍今稀
訟轡車此駐行唱篇知寡和君世負詩名

題漁溪驛

昔年同向臘中迴，曾繞欄干折早梅。
今日獨來攀舊樹，風翻黃葉下蒼苔。

晚上碧峰亭

城頭近晚忽開晴，有色皆鮮是物清。
地勢四來州午向，山圍一罅水東行。
乘風歌吹無時已，面日樓臺觸處明。
不比兒曹誇衣錦，自緣恩與養親榮。

春潮

納納春潮草際生，商船鳴櫓趁潮行。
封書欲寄天涯意，

海水風濤不計程

病中偶書二首

已感節候變物態舒陽春那復壯年意如今多病身淨
室焚香久烘爐煮藥頻神歡百慮解銷盡眼前塵
行年三十六幾是半生人舉止不入俗清修難厭貧宴
坐爐烟煖微醺甕酎醇前看簫管輩未免作埃塵

和王介夫遊西禪兼呈黃承制

山城只有四圍青海國都無一點塵荔子風標全占夏

荷花顏色未饒春水邊清吹傳觴久路上殘陽立馬頻
不是閒來誇景物欲將謠俗寄王人

興化軍曹殿丞荔支

厚葉纖枝新絳囊使君分寄驛人忙彩毫封處曾留意
筠籠開時不減香風色甚豪應少損路程差近得分嘗
閩州縱有千千樹未抵家園氣味長

和曹殿丞寄荔支

荔子凝丹摘曉鮮江南來路與雲連託根曾是三山下

結實應歸萬木先鄉國遠携甘旨重宴堂分翫色香全
清才仍更傳新唱一一驪珠照眼圓

飲薛老亭晚歸

終日行山不出城城中山勢與雲平萬家市井魚鹽合
千里川原彩畫明坐上潮風醒酒力晚來巖霧蓋鍾聲
歸時休更燃官燭在處紗燈夾道迎

和許寺丞泊釣龍臺見寄

釣龍臺下艤行橈獵獵船旗待晚潮萬里征人應悵望

一川秋色正蕭條雨雲來去山明滅風浪高低日動搖
有志四方男子事莫懷鄉國便魂銷

十一月後庭梅花盛開

迎臘梅花無數開旋看飛片點青苔幽香粉艷誰人見
時有山禽入樹來

日暖香繁已盛開開時曾遶百千迴春風豈是多情思
相伴花前去又來

發篋得亡友書札

宿昔重交義零落今誰存
舊情留紙扎永恨入丘墳
世味薄於水生涯空似雲
撫孤無力及流淚復何言

寄荅汝州王仲儀待制

汝水閩山道路長行郵時復寄新章
諫垣笑別三年近病枕魂飛萬里強
烈火未應焚玉石埋輪曾是問豺狼
主恩未報頭生白羞見龍泉百鍊鋼

正月十八日甘棠院

上元纔過去尋春紅白山花粲粲新
似喜使君新病起

隔欄相向笑迎人

天氣和柔酒更醇
緩歌花底正青春
狂花有意憐醉客
撩亂飛紅滿一身

無奈閒情着物歡
更愁花草便闌珊
天紅嫩翠宜燈燭
放散笙歌靜裏看

福州寧越門外石橋看西山晚照

寧越門前路歸鞍
駐石梁西山氣色好
晚日正相當

夢遊洛中十首

有序

九月朔予病在告晝夢遊洛中見嵩陽居士留詩屋
壁及寤猶記兩句因成一篇思念中來續為十首寄
呈太平楊叔武

天際烏雲含雨重樓前紅日照山明

夢中兩句嵩陽居士今

安否青眼看人萬里情

司門員外郎王益恭年四十餘致政居洛中自號嵩陽居士

脩竹蕭蕭曲檻前清泉瀼瀼小池邊琴中一弄履霜操

人靜當庭月正圓

予為留守推官新作綠竹堂王勝之劉伯壽多會宿彈琴

過雨池塘涼氣早落花門戶亂紅多松亭石上題名處

誰剥莓苔看，在麼

王相宅號史館園嘗與府僚遊宴題名石上

廟下春行香霧合，觀中朝茹藥芽尖。故人別後無消息，

荒草生墳白露霑。

嘗與尹子漸遊嶽廟寺觀今子漸亡矣

霜後丹楓照曲堤，酒闌明月下前溪。石樓夜半雲中笈，

驚起沙禽過水西。

從尹師魯宿香山石樓

韓王宅裏酒千壚，范帥園中花萬株。行樂主人今已矣，

春風還似舊時無。

趙韓王宅有藏酒百千器范太尉宅花最多

名花百種結春芳，天與穠華更與香。每憶月陂隄下路，

便開圖畫覓姚黃

月陂張家牡丹百多
餘種姚家黃為第一

草白霜晴鵲眼開
原頭遊騎四邊來
枯叢鴟鵂休驚噪

日暮分持走兔迴

曾權洛陽縣屢
陪諸君出獵

履道園池竹萬竿
竹間池際笋斑斕
當時酒所誇文戰

今日誰登上將壇

普明寺乃白樂天履道第
水竹最佳數為文字飲

白馬寺前冠蓋盛
送行賓友盡英豪
耿丞血染邊場草

留得聲名日月高

罷官時交遊送餞白馬
寺耿大監丞今死西事

題何山人大隱閣

萬井連交道中天敞靜軒由來隱鄜市全勝賁丘園目
極無留賞心間不避喧洎光搖屋動花豔出欄繁雨霽
山容靜潮生海氣昏幽人披彩檻永日對芳樽素業名
家久通醫與義存丹圖環八卦仙訣遁三元造化今為
友懽憂本聚門應須超世累宴坐此忘言

正月巡歷部郡侍親還家

養親方解郡奉使又還家遠岫鄉關近前旌父老遮揮
金貧自愧舞綵喜仍誇特地延賓友相期詠白華

方山渡口占

江上行人空自愁
壯年雙鬢已驚秋
不知風裏千重浪
何事無情也白頭

江村

黯淡江村春日斜
江洲芳草野田花
孤舟橫笛向何處
竹外炊烟一兩家

三月再還家

曉樹鄉關路
春衣使者輶
江眠聞落霰
野飯掇新苗
入

里威稜減寧親喜氣饒勤勤父師教民病若為消

宿海邊寺

潮頭欲上風先至海面初明日近來恠得寺南多語笑
蜚船爭送早魚迴

建溪桃花

何物山桃不自羞欲乘風力占溪流仙源明有重來路
莫下橫枝礙客舟

吳屯驛曉起

殘月依山明朧臆長烟浮水白模胡竹林繞舍啼鴉白
石井當窓下轆轤迎吏遠傳空狀小僕奴潛報一錢無
騶兵不管晨炊絕呵叫從籠意氣麤

王臺驛見晚李花有感

玉京仙子愛春芳弄遍瓊枝嗅盡香祇有此花知舊意
又隨風色過東牆

晝寢宴坐軒憶與蘇才翁會別

投涼下馬卧僧家遶簾清風卷絳紗脩竹滿前微雨過

遠山無際薄雲遮武侯舊隱人應到

京西提點刑獄
廨宇在鄧州閩

粵孤城日自斜鮮與塵心消百事更開新焙煮靈芽

漳州白蓮僧宗要見遺紙扇每扇各書一首

山僧遺我白紙扇入手輕快清風多物無大小貴適用
何必吳綾與蜀羅

野老尋山翦白雲欲將清吹助南薰不堪便面張京兆
恰稱能書王右軍

徑尺規圓比雪霜昔人何事恨秋涼珍藏篋笥未為失

更有明年夏日長

武侯白羽麾三軍
帳前甲馬生風雲
憐君才地亦踈薄
相過書林至夜分

薄似蒲葵質更圓
忽疑明月落尊前
南堂暑氣生煩濁
一座清涼直幾錢

澗白新牋卷線綾
刮青纖竹纏紅藤
可憐子夜書帷下
一片圓光得未曾

堂陰壁罅蚊蚋都
指揮西向先驅除
山翁一夜穩眠睡

若或論功誰勝渠

老去將攜只要輕
况臨炎暑遶風清
兒童愛把承簷溜
未識山家質素情

不掩歌脣向畫堂
不須名筆作花房
直應攜去林泉好
轉覺林泉興味長

虛堂永晝來風長
石枕竹簟寒生光
文園肺渴厭煩熱
更要夫君在側傍

懷文雅儼上人

填填車馬走沙塵中有伊人離俗氛
千里不逢京下信
五年虛斷海邊魂何窮世事秋林葉
自在心靈晚岫雲
聞道西堂今睡穩暮鍾朝磬欲何云

寄題處州朱山人幽居

之子適所遇愛此山林居
禪心庭下樹仙訣枕中書
溪明暑醉後洞暗春遊初
逢疴藥錄補得意琴聲徐
人生隨樂住世事與閒疎
勿用挂雲網孤鴻翔太虛

耕園驛有序

明道中予為漳州軍事判官晚秋嘗至州西耕園驛
驛庭有佛桑樹十株開花繁盛念其寒月窮山方自
媚好乃作耕園驛佛桑花詩一首既而乘桴東下又
作溪行一首慶歷七年予使本路明年夏四月自汀
來漳復至是驛花尚仍故追感昔遊因紀前事并載
舊篇龕於西壁

使輶迢遞到天涯候館遷延感歲華白髮却攀臨砌樹
青條猶放過牆花悲來唯見金城柳醉後曾乘海客槎

欲問昔遊無處所晚烟生水日沈沙

題白蓮院東軒

有序

漳州白蓮院予為郡從事時多所醺遊今十有五年
因使復來當時遊者零落殆半愴然成詠寄題東軒
兼簡宗要上人

昔年文酒自為情身外鴻毛萬事輕暑醉每憐風引夢
夜歸多見月隨行重尋蘭若餘芳在却恠桑門老態生
點數朋遊今有幾拂塵看字淚先橫

端明集卷五

欽定四庫全書薈要卷一萬四千五百六

集部

端明集卷六

宋 蔡襄 撰

律詩

後舍緋桃

十年樹底折香葩
蔌蔌浮光弄曉霞
只恨無情是風雨
直將紅片入西家

題龍紀院僧室

山僧九十五行是
百年人焚香猶夜起
喜酒見天真生

平持戒定老大有精神須知不變者那減故時新

宿黃蘗聽彬長老譚禪

一圓靈寂本清真誰向蒼浪更問津
欲說西來無見處奈何言句亦前塵

南劍州芋陽舖見臘月桃花

可笑夭桃耐雪風山家牆外見疎紅
為君持酒一相向生意雖殊寂寞同

士安飲我數杯至觀音院纔醒聞灘聲泉響因留

短闕

林外灘聲砌下泉
泠泠幽響靜中傳
朝衫却染京塵去
爭得夫君醒醉眠

別邵武長史朱照鄰

竊比君侯病馭驄
時看雲路忽長嘶
十年還此同杯酒
三驛剛來踏雨泥
士行滿鄉元自好
官名當世不勝低
未霑釜粟榮新祿
應上亨衢別有梯

相送
三日

自漁梁驛至衢州大雪有懷

大雪迷空野，征人尚遠行。
乾坤初一色，晝夜忽通明。
有物皆遷白，無塵頓覺清。
只看流水在，却喜亂山平。
逐絮飄飄起，投花點點輕。
玉樓天上出，銀闕海中生。
舞極搖溶態，聞餘浙瀝聲。
客爐何暇煖，官酤未能醒。
薄吹消春凍，新暘破曉晴。
更登分界嶺，南望不勝情。

華嚴院西軒見芍藥兩枝，追想吉祥賞花，慨然有感，寄呈才翁。

辛卯四月

吉祥亭下萬千枝，看盡將開欲落時。
却是雙紅有深意。

故留春色綴人思

烘簾微照自生光
吹面輕風與送香
誰把金刀收絕豔
醉紅深淺上釵梁

的的名花對酒樽
欄邊沉醉月黃昏
今朝闕外尋蘭若
忽見孤芳欲斷魂

崇德夜泊寄福建提刑章屯田思錢塘春月並遊
夙昔神都別于今
浙水遭故情彌切
到佳月事追遼太
守才賢重清明
土俗豪犀珠來戍
削鉦鼓去啾嘈
湖樹

涵天潤船旗，胥日高醉中春。渺渺愁外夕，陶陶新曲尋。
聲倚名花逐，種褰吟亭披。越岫夢枕覺，胥濤論議刀。矛
快心懷鐵石牢，淹留趨海角。分散念霜毛，鱸膾紅隨筋。
予之瀧波綠滿篙，君往嚴瀧試思南北路，燈暗雨蕭騷。

嘉禾郡偶書

盡道瑤池瓊樹新，仙源尋到不逢人。陳王也作驚鴻賦，
未必當時見洛神。

讀宿州天慶觀門扉仙篆有感

玉骨霞衣帝所遊
案前香氣與星浮
無端醉語落塵土
一過人間四十秋

送張處士二首

垂垂秋雨沒羈泥
經畫門前無馬嘶
乘靜因題送行什
江南歸思已淒迷

梁園塵土著人腥
不似淮山照眼明
愛君心迹曾無繫
一片孤雲去就輕

溫成皇后挽詞二首

紫極騰軒曜青春委薜蘿雲輶何處去金殿幾時還
仗下編簫咽陵中夜燭閒六宮哀送返疑是夢魂間
翟綵開新禮金文易大名真游上仙路故物感皇情
月落辭丹禁春前引素旌宮闈鳴挽鐸不是佩環聲

司徒侍中宋宣獻公挽詞五首

重器推隆棟光逐逝川人應騎尾宿歲亦在辰年文
思精天下忠謀盡帝前唯無豐室累清白是家傳

申命增華袞遺忠動紫宸世風存令子暮哭有慈親復

辟前言在論兵密疏陳如何年不永無路問蒼旻
懷道初名世乘時遂致君平分百年筭中据兩台文行
翬連寒樹疑笳上晚雲路人那得識揮涕指幽墳

洛宅初開府非才辱顧隆遺思謠俗在餘論宴堂空已
矣蒼生望嗟乎吾道窮豈惟懷舊德一慟向春風

去歲洛城東公歸秉樞務今日國門西轎車行哭度同
此晚春節依舊西山路千古訣幽明一年纔旦暮遠恨
寄山川餘哀慘雲霧平昔送公詩何言歌薤露

哭賈少卿

庚辰年自潭州謫所遷少卿知廣州未行卒

畫旗南度謫長沙
粵海新恩路更賒
子日鵬來知主去
辰年龍會為賢嗟
猶多婚嫁先捐館
無復田園可寄家
曾是德公推獎厚
一觴何處酹魂車

別顏慥下第

四上不登第漂流二十年
依依去國恨杯酒春風前

和杜相公謝寄茶

破春龍焙走新茶
盡是西溪近社芽
纔拆緘封思退傳

為留甘旨減藏家鮮明香色凝雲液清徹神情敵露華
却笑虛名陸鴻漸曾無賢相作詩誇

謝杜相公

有序

伏覩宮傳相公精詞健筆輒然成詠敢觸冒戰鋒但
伸懃懃之至

謝政聞宮傳當年老相君詩情通造化筆力作風雲是
則經綸手施於淡泊文捧窺心感悸無路候公門

銓舍後軒

秋欄疎索水荳花坐見花邊日向斜莫問幽人超世訣
即心無累是仙家

閣下晝眠

急雨初收宮殿明紅薇花落暑風清忽傳午正驚殘夢
寂寂西軒喜鵲聲

戲荅王仲儀

零落黃花動節辰送行杯酒感風塵誰知最恨張京兆
畫徧脩眉不示人

哭石曼卿

仕宦晚益困忽驚朝露晞嗟嗟命不偶事事志多違直
節未嘗屈英魂何所依有材真國器無悶即天機前日
猶言笑今亡果是非城南春滿路空見素旌歸

銅雀妓

十五燒香總帳前幾多幽怨入危絃誰知千載臺傾後
何處西陵有墓田

城西射弓挺之以病不至簡示新詩有唯應欠我

渭城歌之句謹吟一篇以答佳意

雪後西郊物外清
官閒乘興此間行
出門踈樹無塵色
入內流渠帶野聲
近臘酒醪香更醖
得風弓箭力還生
知君病起心猶壯
獨背船窓唱渭城

汾陽夫人挽詞二首

其夫李留後
端懿國甥

福偶天家出賢名
戚里推朱顏不待老
萬事却成悲宿露
霑新隴秋風過舊帷
誰歌均一德傳繼召南詩

借有百年在都如一夢
迴幻生還復滅仙去不重來
樂

色閒宵院衣香秘夜臺行人知令淑哭送侍兒哀

泰靈園書事

檻外珍叢砌下泉祥符天子泰靈仙忽逢野老臨池水
自剪殘花趁歲錢

上元天仗款琳房靈圃遙傳玉殿香要識年年桃李色
不關春力是恩光

讀太平告身

綾紋金彩射星霞潤墨新騰玉署麻不用著心驚寵辱

去來元是坦空華

因書答河東轉運楊樂道

前歲君提嶺外兵
國門南路送君行
由來成事多天幸
直向危時見世情
勉力朝廷論大計
甘心江海就私榮
予請罷開封府出知泉州
牢愁應解侵人骨
未老先教白髮生

楚州聞晚角有懷

欽天門外警場開

郊宮有欽天門

畫角千枝疊鼓催
今日淮邊

孤壘畔
晚風時送數聲來

過真慧素上人院見紅薇盛開因思西閣後軒數
株遂成短章寄翰林原叔八丈禹玉閣長兼書真
慧壁間以記所遇

八月吳天覺早涼翠叢初拆碎朱房繁枝欲卧不勝力
落片將飛猶自香西閣二年臨畫夢金刀一夕掩春芳
嘗令花工以綵
為之殊逼真也欄邊想像頻回首漸覺星垣迫漢傍

杭州訪吉祥璘上人追感蘇才翁同賞牡丹

曾乘春飲遶花畦花底餘香入燕泥剪處佳人傳燭下

歸時明月到雲西
重來草樹驚秋色
零落交朋感舊題
若使他年逢勝賞
一觴知復共誰攜

寶月法喜堂

少悟浮圖法
因傳法喜名
於人無厚薄
知己盡豪英
藥舍朝爐暖
碁窓夜燭明
性懷元自得
未用厭逢迎

過泗州嶺

衢州道中是年冬十二月
室家永嘉郡君葛氏亡逝

二十五年間
三迴共往還
那知臨白首
相失向青山
想像音容在
侵尋髮髮斑
平生多善行
應不下塵寰

丙申元日過浦城西陽嶺

曾侍天王玉几傍

累年侍
執壽觴

捲簾袍色殿中央
重霄未徹

宮懸樂上宰初持萬壽觴
曉日半臨幡影轉
春風偏送佩聲長
今朝千里穿雲嶺
喜奉親輿返故鄉

宿魚梁驛

庭樹踈踈河漢低
瓦溝霜白月平西
寒鴉不奈單棲苦
落泊驚飛到曉啼

過南劍州芋陽鋪見桃花

七年相別復相逢
牆外千枝依舊紅
只有蒼顏日憔悴
奈緣多感泣春風

見勻親抄書涕悼卷末

得汝抄書心自喜
古來清白紹家難
誰知向老秋燈下
一見親蹤不忍看

寓居興化轉運廨舍

病惱連春夏
居閒意味長
海風生永晝
山雨送微涼
書帙梅蒸潤
衣巾荔實香
塵緣消遣盡
物我兩相忘

丙申五月遊興化西門上溪

尋溪因過上溪遊雨後溪渾水亂流因傍堤松却飛蓋
為聞山鳥輟鳴騶平田穰稌青雲合滿谷芭蕉碧玉抽
開濟無功須早去故時瓜隴有通侯

謝宋評事

有序

伏蒙評事宋丈分貺家園丹荔世傳此樹已三百年
黃巢兵過欲伐之時王民主其樹其媼擁樹願并戮
巢兵為之不伐今雖老矣實益滋繁味益甘滑真佳

樹也因成短章用酬厚意

齋館從容接燕申每臨佳樹走觥巡兵鋒却後知神物

年壽高來况主人並賞昔聞思故友

公嘗言陳太監方諫議及大卿並曾

會賞分甘今喜奉慈親豈唯持祝公難老兼欲靈株比大

椿

謝阮評事

有序

伏蒙評事阮丈手授祕文輒以蕪音用投真賞

手授新書荷至情何時仙訣得真精高年轉覺面顏少

細字全由眼力明藥錄謾勞分上下丹爐終費候虧盈
爭如一語醒然悟獨葆天光不外營

和詩送茶寄孫之翰

北苑靈芽天下精要須寒過入春生故人偏愛雲腴白
佳句遙傳玉律清衰病萬緣皆絕慮甘香一味未忘情
封題原是山家寶盡日虛堂試品程

泉州安靜堂

庭松永晝轉春禽天氣初晴又半陰惆悵此生多病惱

正堪行樂獨傷心

泉州北藏院見初荷華

初華纔過小荷身
曉露霑紅點點勻
莫為愁心偏倚望
清江元有未歸人

詔貢士

星騎翩翩鶴詔來
旋聞歡語沸春雷
天閑未減真龍種
滄海還空老蚌胎
拂紙半毫含意勁
摩雲雙翅待風開
寄言商頴辟榮客
好致吾君放首迴

福州堂下小欄花卉多是手栽今已繁盛因賞花
有所感悼

愛花盡日傍花臺點檢當年手自栽前事已隨朝暮變
舊華空見淺深開山禽忽下還飛去溪雨纔收又復來
只有春醪能遣恨無人欄畔共持杯

登四微亭

偶爾尋幽上翠微遊人啼鳥似前期花間行印露霑紙
山下放衙雲滿旗艷艷舞衣朝日處飄飄商櫓落潮時

傳杯且與乘春醉身世悠然兩自遺

登清風樓

郊外清溪溪外山溪雲飛上破山顏
晴明天氣琉璃色何處峰頭帶雨還

榴花洞

洞裏花開無定期落紅曾見逐泉飛
仙人應向青山口管却春風不與歸

寄南海李龍圖

允

求素馨含笑花

二草曾觀嶺外圖
開時嘗與暑風俱
使君已自憐清分
分得新條過海無

寄題張景山大卿園池

人仰公才世吏師
更甘歸老舊林池
門闌清似當官處
心力強於少壯時
物理自冥非寄酒
兵謀猶在却因棋
濠邊風月如招隱
願拂塵裾從所之


端明集卷六

謹案卷四第二頁前七行曠古絕續緣刊本黃訛
寅今改

卷五第十二頁後三行聞道西堂今睡穩刊本睡
穩訛粹隱據別本改

卷六第八頁前三行檻外珍叢砌下泉刊本砌訛
叨據別本改





總校官庶吉士臣張能照
校對官助教臣黃昌禔
謄錄舉人臣周克鵬

欽定四庫全書薈要

集部

端明集卷

七至九

詳校官助教臣常循



欽定四庫全書薈要卷一萬四千五百七

集部

端明集卷七

宋 蔡襄 撰

律詩

仁宗皇帝挽詞七首

道德由來太古同，生靈休養至仁中。
五兵不試歸神武，萬物無私是化工。
玉座忽逢春月盡，金旌遙指洛川窮。
年年翠輦長陪扈，那向西城別梓宮。

向近千秋節，何言七月期。
遺恩羣玉宴，往事荷宮祠。
仙

路雲龍會秋風鼓角悲萬人瞻彩仗猶認吉行時
聲教中原泰恩仁萬國臨憂勤符帝夢付與得天心簫
吹凝寒氣雲山歛夕陰還期千載後歌頌莫知深
儉薄留遺詔遵行在繼承桐棺會稽冢瓦器孝文陵闕
外秋螢度林端曉月澄須知無可欲終古不騫崩
萬世威神在多方惠澤隆密音通虜壤行哭亦兒童畫
翼離丹闕幽堂對紫嵩孤臣空雨泣白首抱遺弓
儉勤追禹績恭讓體堯仁措枉朝多直除苛吏盡循遵

儒恩禮異立威賞刑均立子知天意超然即上賓
攢宮開七月隧路閑千秋地帶三川拆天含萬國愁烏
雲知聖沒龍駕想神遊厚祿將無報慙恩更白頭

昭陵行

宮人上臨候昏鍾簾外香煙燭影紅庭栢飛霜陵漏永
可憐今夜月明中

和子發有序

天聖八年寄居悟空院留詩僧壁今三十五年人事

變遷存沒感懷子發遠惠新編語及曩舊披覽數過
悽惻之極輒復短章少伸懃懃

空梁詩板歲年多唯有秋蟲占作窠聞道故人時拂拭
此生無奈舊情何

有遺梅花枕前者因成

誰寄梅花置枕傍前時復得枕清香因香夢徹江南路
江水浮天月似霜

甲辰寒食遊公謹園池

二月名園蓊鬱青為憐佳節此閒行偶因觴詠心還適
暫離塵埃眼倍明風靜落花深一寸日遲啼鳥度千聲
主公高意何須道芳物於人自有情

四月十七日奉安仁宗皇帝御容於景靈孝嚴殿
是日舟次陳留感懷述事十六韻

先帝傳基固真人嗣統平餘恩華夏在高誼古今傾漢
法原為廟仙居別有京海中金闕見天上玉樓成睿意
懷丕烈宸毫薦大名孝唯將舜擬嚴亦與周并龍向朝

雲起奎和晝日呈流光俄洊歲發號慶重明令節千秋
過端儀萬衆迎謹呼山嶽動驅拂鬼神驚縹緲來佳氣
雍容下太清旛旌多異制歌吹自新聲琳館初停御鑾
輿始此行盥孚通至感福澤被羣生往事時兼遠孤臣
淚獨橫晨興西向久悽斷老年情

至鑠外

旗聲不斷鼓聲催堤柳陰濃野色開今日客衣何事淨
京塵不肯出城來

洪澤阻風

今日風期惡遲迴一水濱
村旗呈酒聖廟鼓賽河神
躍鯉曾驚網饑鳥不避人
商工時借問何處即通津

遊金山寺

平日靡塵土今遊興味長
波濤圍四際臺殿起中央
魚聽晨餐鼓雲和夕炷香
薰風休遞吹襟袂不勝涼

五月宿江陰軍葛公綽草堂

曾解征衣寄草堂枕邊泉石自生涼
休論仙訣能延壽

暫得身閒夢亦長

七月過孤山勤上人院

青林藹藹日暉暉
薄晚涼生暑氣微
湖上清風如可載
畫船十隻不空歸

重陽日有美堂南望

越壤吳封繡錯分
華堂繁吹半空聞
山峰高下抽青笋
江水東西卧白雲
菊蕊芬芳初應節
松林照耀欲迎暉
州人不見歸時醉
未擬風流待使君

韓王汝山堂會別梅花已盛至蘇州示諭水鄉天
寒未開

遙知畫舫艤江隈寒勒梅花未得開唯有山堂紅燭下
至今繁艷傍尊罍

梨園小部

有序

梨園法部更置小部音聲三十餘人帝幸驪山楊貴
妃生日命小部張樂長生殿因奏新曲未有名會南
方進荔枝因名荔枝香

傾宮晨起傳輕粧
山殿生風夏日長
小部新聲落天上
無人知是荔枝香

答葛公綽

丙午年正月邀葛公綽宿杭州山堂公綽遺詩有為
是山堂似草堂之句因以答之

山堂爭似草堂清
俗事隨人百種名
賴有四窓春茗在
甌中時看白雲生

公綽示及生日以九龍泉為壽依韵奉答

多謝山人遠祝延壽杯仍是九龍泉

九龍惠山別名

餘生事事

無心緒直向清涼度歲年

和荅孫推官久病新起見過錢塘之什二首

於世無機是海翁客情醒醉任鄰鐘
廉纖雨意還侵夜料峭春期未減冬
寶氣上浮難掩玉歲寒中立不凋松
君王自結英雄網千載風雲定有從

病來安健賦詩誇甲子新移一歲加
吾道所存唯浩氣世緣何著但空花
烟雲已過同歸鴈楊柳初藏並宿鴉

便擬尋山逐幽趣春泥隨馬不須遮

和夜登有美堂

忽聞乘月上層臺正值江湖夜色開雲屋萬重燈火合
雪山千仞海潮來靜遊雖有詩情得獨笑應無俗語陪
縱使羈懷多感慨若逢清致少徘徊

和偶登安濟亭

津亭遙望草萋萋空曠清懷與物齊春水倒行潮欲上
晚雲平壓日先低高城覽古人何在遠渡傷離客自迷

好共山翁同出處不隨朝騎五門西

和江上觀潮

地卷天回出海東人間何事可爭雄
千年浪說鷗夷怒一信全疑渤海空
寂靜最宜聞夜枕崢嶸須待駕秋風
尋思物理真難測隨月虧圓亦未通

和答孫推官

擬將身計入扁舟縱得三公不黑頭
病體已輕休賦鵬機心如動輒驚鷗
強看吳野江山醉肯為春風花草愁

所向乾坤皆客寓可能於我更遲留

和古寺偃松

古寺無人野蘚滋空庭永日雪風吹橫柯圓若張青蓋
老幹孤如植紫芝萬乘未輕蟠木器千年終與大椿期
須知才短為天幸江上婆婆得所宜

和新燕

燕燕何來處處喧新從海上振輕翰卑飛不避春泥重
並語應愁夜雨寒客舍暗窺吟筆健宴堂時見酒盃乾

雕梁信美多移主願爾將雛擇便安

開州園縱民遊樂二首

風日朝來好園林雨後清遊魚知水樂戲蝶見春晴草
軟迷行迹花深隱笑聲觀民聊自適不用管絃迎

節候近清明遊人已踏青插花穿戟戶酤酒向旗亭日
迴林光潤風迴海氣腥未知何處樂歸路已嚴扃

遣興

苦竹生筍四五寸櫻桃開花千萬枝空濛野色當樓處

寂寞春寒帶雨時已放清歌逐瑤管旋篳新釀行金卮
哀翁酩酊自為樂舉鞭不問并州兒

夜雨病中

久雨曾無度陽和漸向闌雜香生衆木濃翠入孤巒漏
緩宵仍靜燈微曉更寒芳時猶卧病何日出城看

寒食西湖

山前雨氣曉纔收水際風光翠欲流盡日旌旗停曲岸
滿潭鉦鼓競飛舟浮來烟島疑相就引去山禽好自由

歸騎不令歌吹歇萬枝燈燭度花樓

上巳日州園東樓

地上多於枝上花東樓凝望惜年華
潮頭正對伍員廟燕子爭歸百姓家
粉籜漸高山徑笋綠旗初展石岩茶
流芳自與人兼老樽酒相逢莫重嗟

四日清明西湖

千頃平湖綠一遭空城遊樂自奢豪
畫船爭勝飛江鶻翠巘都浮載海黿
芳草堤邊裙帶短柔桑陌上髻鬟高

樓前盡日聞歌笑不啻秋風卷怒濤

度南澗

隱隱飛橋隔野煙石磯西畔問漁船
桃花盡日隨流水洞在清溪何處邊

入天竺山留客

山光物態弄春暉莫為輕陰便擬歸
縱使晴明無雨過入雲深處亦霑衣

十日西湖晚歸

清晨出郭又晴曛已見空枝嫩葉新爭得山頭能閣日
且容湖上不歸春人隨百戲波翻海酒到三橋月滿身
三橋乃西湖歸路
月中飲於橋上只有牡丹纔半折未知何處可娛賓

十二日晚

欲尋軒檻倒清尊江上烟雲向晚昏須倩東風吹散雨
明朝却待入花園

十三日吉祥探花

花未全開月未圓看花候月思依然明知花月無情物

若使多情更可憐

十三日出趙園觀花

水際開花千萬窠
初鶯時逐麗人歌
欲知太守行春樂
只向東城得最多

十五日遊龍華淨明兩院值雨

垂楊脩竹半藏山
一徑紆回暮雨間
綠滿野田看渺渺
白飛崑溜自潺潺
空村鮐背行歌去
古寺頭陀乞食還
却羨幽人在深僻
斷無來客扣禪關

十六日會飲駱園

名園何事却居鄜永晝游蜂乳燕喧不計陰晴與風雨
卷簾花蘂在尊前

十八日陪提刑郎中吉祥院看牡丹

節候初臨穀雨期滿天風日助芳菲生來已占妙香國
開處全烘直指衣攬照儘從烏帽重放歌須遣羽觴飛
前騶不用傳呼寵待與遊人一路歸

又往鄭園

小小園亭細細風千枝淺白間深紅誰知狹徑無人到
留得青春向此中

十九日奉慈親再往吉祥院看花

天意應偏與春工已盡歸來如從月下去似逐雲飛艷
絕聲名遠清多香氣微輕陰滋潤澤斜照動光輝劇飲
千鍾酒相鮮五綵衣曾非重芳物庶以奉慈闈

二十二日山堂小飲和元郎中牡丹向謝之作

幾家園館見千枝白髮雖多意不衰香澤最深風靜處

醉紅須在月明時已知佳節無餘日

已過穀雨三日

更向殘芳

卷一卮擬放春歸還自語來年老信莫先期

寄錢塘春遊詩呈南陽郭待制

一春遊攬足詩歌寄與南陽遠思多若憶錢塘曾到處
西湖仍是舊煙波

答孫推官

不是窮輪始問途肯將全璧混泥污尚平婚嫁何時畢
陶令田園先自蕪羈旅且甘家四壁牢愁須藉酒千壚

唯應抒素推文富落筆詞章氣象麤

和孫推官憶徑山遊

三十年前浙右行徑山纔稱愛山情油幢慢慢絲杉翠

五山盡植絲杉

環珮涓涓石澗鳴

遠寺流泉

極峻只疑天上逼遙臨

初覺地東傾分符不得重遊賞碣石巖邊記姓名

舊有記徑

山游鐫碣石崑

奉答孫推官南屏舊遊

已憐叢翠在湖邊最勝濃嵐返照前未省天工能刻飾

祇應山骨自清堅巖端下溜添春澗穴底來風送野烟
欲仗何人安屐齒更尋幽徑一攀緣

和登安濟亭

亭上風吹藤帽簷為憐清勝得安恬驚濤觸岸層瀾碎
落日銜山半景尖遙認犀奔知露角忽逢龍挂見胡顏
浙江時有龍起鄉人謂之龍挂城南一去通滄海無限春寒向晚添

和運使王學士舟次德清見寄

洛陽平昔誇文會君已勝冠我壯夫談道最先稱賈誼

憂時曾見哭唐衢

尹師魯兄弟多同會

敢將膠漆論同志幸得湖

山可共娛須向餘春迴馬足柳堤相逐踏青蘼

和運使學士芍藥篇

密葉陰沉夏景新朱欄紅藥自為春香於蘭芷偏饒艷

畫入繡綃未逼真已恨芳華難駐景可堪愁卧動經旬

病起同觀

三年想愛須留戀不為江頭酒味醇

遊煙霞洞

伏承躬侍安輿出遊煙霞洞拙詩奉呈運使學士

新晴特地入煙霞道並南山轉更賒幽磬過隣溪口寺
衆鷄鳴午野人家洞深隨溜先如雨石古籠藤亂放花
潘岳小園猶作賦輕軒選勝樂無涯

寄來安孫推官

我愛孫公子安貧無所營相逢雖邂逅一見即平生黑
電揮詩筆黃河瀉酒觥輕舟何處在別思若搖旌

段家堤西望晚山

月下西山千萬重日光山氣鬱葱籠鮫綃數幅須移得

惆悵如今無畫工

孫武篇

入官無所解因咲得君憐豈知孫武子自欲逞威權

西施篇

越國無雙艷吳宮未始知誰言勾踐黠不自愛西施

唐彥猷挽詞

二首

聶亮馳名久孤高進路難富文平日業勸學晚年官
隧外春江靜林邊曉露溥唯應墳上土猶解是芝蘭

舊德推當代新悲入故鄉
直當冠獬豸清可濯滄浪
美研精煤色文甌畫茗香
生平無復見流涕送幽堂

六月八日山堂試茶

湖上畫船風送客江邊紅燭夜還家
今朝寂寞山堂裏獨對炎暉看雪花

和錢端明遊南屏山

新秋初變一天清急雨仍添萬木聲
山勢不根空外起湖光無際槩來平
錦衣應有徘徊戀金地聊開燕樂情

哀暮典城何所用願公雲路羽翰生

送錢端明還京

禁墀初別紫霄端故國生光里俗懽二世家聲聯將相
百年廟貌儼衣冠躬臨州戟迎門下

每至州廨客次下馬

人喜曾

孫夾道觀石照老苔封舊迹錦溪喬木涕清瀾東趨越
嶺興懷遠夕聽胥濤入夢閒江上馳心思魏闕日邊歸
路指長安香深離渚花重叠涼滿行舟酒半闌應念非
才持虎契平時相繼入金鑾

清暑堂會同年

當年綠髮上天衢三紀於今雪滿鬚
榮路風波多契濶畫堂歌吹暫懽娛
杯中明月時搖動草際飛螢乍有無
莫問更籌須劇醉四翁同籍亦難俱

清暑堂中秋夜飲

江國初涼夕漏均青天無翳地無塵
蓮花翦綵燈光燦蕉葉傾金酒味新
時節暗遷應不再懽娛難得莫辭頻
明年今夜中庭月依舊寒光別照人

端明集卷七

欽定四庫全書薈要卷一萬四千五百八

集部

端明集卷八

宋 蔡襄 撰

律詩

宋君輔許當世陳彥謙蘇宣甫自遠還鄉上元同
飲

故國逢君慰喜偏
清宵行醺重留連
山樓上火人初合
天漢無雲月自圓
樂色時聞花院裏
春風都在酒旗邊
莫辭徹曉須沈醉
後會還應不計年

李閣使新種洛花

堂下朱欄小魏紅一枝濃艷占春風
新聞洛下傳佳種未必開時勝舊叢

園館春遊只帝京可憐哀悴海邊城
縱然得酒心猶在若也逢花眼亦生

客有至自京師言諸公春間多會於元伯園池因
念昔遊輒形篇詠

綠渠春水走潺湲畫閣嵩巒映碧鮮
酒令已行金盞側

樂聲初急翠裙圓清遊盛事傳京下多麗新詞到海邊
曾是罇前沉醉客天涯回望重依然

秋日

城頭蔓草受新霜天外孤鴻叫夕陽送客情懷楓樹老
著人襟袖菊花香

秋日登郡樓二首

秋水已復漕秋風初怒號天容霜後淨山勢北來高
落葉隨飛鳥疎砧答暮蟬悠悠成樓角悽切萬家傳

七月二十四日射弓

破的心仍在爭豪力不堪開弓初覺顫盈貫未離貪哀
病先期老中年豈分甘唯應罇酒在萬事一醺酣

七月二十四日食荔枝

絳衣仙子過中元別葉空枝去不還應是天人知憶念
再生朱實慰衰顏

中秋夕獨坐望月

萬里淒凝魄幽深在處通清流河漢盡寒入水雲空踰

久方全白彌高適正中開書還自卷把酒復誰同泣葉
溥宵露吹衣變暑風更看庭樹影漸過粉牆東

九日許當世以詩見率登高

霜雲明淨海山隈一境登臨始此回堂上壽觴淋浪滿
欄邊佳菊似疑開故鄉情味人人好今日榮恩節節來
正是秋風洗煩暑力將衰颯上高臺

杭州璘上人以花栽數種見寄

名品參差十數窠商船千里任風波土花分破根株小

春色隨來意氣多欲種更看移樹法將開須與傍欄歌
中年漸不勝杯酌紅翠他時奈爾何

冬溫

海曲封疆僻冬溫氣序差蟲蛇誰閉戶草木自開花霧
重朝迷日風號夕卷沙可憐天地雪偏解舞京華

庚子上元即事

老去年華只自驚又逢佳節向山城春臨半夜寒猶重
月到中天色更清上客風流連宿醉遊人歌調得新聲

遙思鳳闕行時令紅繖朱欄萬燭明

醉後

醉後歸來月滿衣重重花影帽簷歌行人路畔猶相笑
未似山翁倒接離

朱樓

朱樓燈燭一聲歌臘後天街月色和平昔黃公酒壚下
誰知跬步邈山河

一百五日開千葉間金

西園花蘂過中春微雨初晴不受塵
莫恠芳叢開發早
欲將紅艷送行人

安靜堂庭松

偏愛堂東砌下松三年瀟灑伴衰翁
寒聲動蕩潮初上
踈影孤圓月正中清徹紗帷延晝夢
綠涵金盞帶春風
自緣多病饒歸思便覺山林野意通

四月池上

風下平池水暈開池邊露坐水風來
草香冉冉生吟席

雲影飛飛度酒杯
荷葉偶成雙翠蓋
荔枝纔似小青梅
人間物靜兩相得
月色蒼涼始肯迴

乞雨題西方院

有序

嘉祐三年七月某再領泉山是歲春夏不雨祈飛陽
廟明年旱詣靈嶽祠又明年五月復來三次皆晝寢
於是頻年不稔豈非郡守不德之致乎

年年乞雨問山神
羞見耕耘隴上人
太守自知才德薄
彼蒼何事罪斯民

北園登高即事呈諸同僚

江雲寒薄不成霜九月登高菊未黃飛鏑有聲弓已力
小槽分溜酒初嘗秋容行見丹楓老客意難勝紫陌長
時被召還都曾是禁園風物好故鄉時節可能忘重陽賜宴外園

送馴鹿與東禪長老

二年馴擾傍山家欲領東還道路賒送汝給孤園裏去
此生長伴大牛車

畫生李維寫予像今已十年對鑑觀之因題其側

清眸綠髮十年前，朴野風神不易傳。今日青銅莫相照，白髭垂頷面雙顴。

將赴京留題山莊西壁

禁林京尹荷恩光，三上需頭乞郡章。貧薄奉親須仰祿，此心安敢繫軒裳。

燕司封同年以詩見迎

寄問閩州明使君，十年蹉跎路岐分。帳前約束承嚴節，

福州乃泉之轄

按下文書接署雲

隔政知福州

北去最先趨畫戟，老

來應免醉紅裙新篇一攬思遊舊搔首孤吟日又曛

題共樂亭

層巒高與赤霄通節歲歡娛衆庶同庭有美音非獨樂
岳音會當炎暑自多風山川勝勢攔干下井徑追遊月色
中私幸編民居客右使君樽酒未應空

徐虞部以龍尾石硯邀予第品仍授來使持還書
府

玉質純蒼理緻精鋒芒都盡墨無聲相如間道還持去

肯要秦人十五城

辨歛石以此法若端石則不然

過囊山寄宏師

三十年間登第初
青衫羸馬叩禪居
鬢毛白盡猶奔走
慚愧高人得自如

人日立春舟行寄福州燕二司封

清溪潮上送行船
回望高城隔曉烟
景色似看名畫展

前日君家畫醉魂猶憶壽杯傳

君家世傳壽杯行之侑酒

春盤食菜思

三九人日書幡誦百千
南國逢君唯道舊
後時何處笑

今年

又寄興化徐虞部

梅花狼籍拂輕舟
人日溪行動客愁
上國去程初北首
故山歸思滿東流
垂垂朝雨隨雙槳
草草春蔬送一甌
不獨懷鄉便多感
看人難似府君侯

上元至南劍州大雨寄泉州許通判

路遠溪回不計程
行郵今復宿延平
陰雲藏月不知處
急雨落天無數聲
病起尚疑羣蟻閫
夢餘初聽一雞鳴

泉山去歲同遊賞惟有神君識此情

大湖驛寄建州同年實職方

別驛臨溪曲清寒結曉陰灘聲生亂石雨意在閒林登
第年華久相逢禮愛深茶山春物近那得共追尋

嘉祐辛丑蒙召還京二月八日道過陸氏之門因
觀小欄花卉

風色微和日晝明小欄花卉新芽生行人不是愛春物
一見芳叢似有情

題嚴先生祠堂

遵此巢由志誰希公相權人瞻祠樹古天作釣壇圓高
節千秋外遺蹤一水邊孤風敦薄俗豈是愛林泉

杭州過璘上人花園

封培剪剝奪天工欄下長年見萬紅投老暗知心力少
自開還落信春風

雪

六年守郡在天涯冬煖無因見雪華今日復看千里白

強憐寒色作詩誇

寄題華藏院清軒

湖邊無地有塵埃
况復虛明向北開
山色每隨朝氣變
水光長共夕陽來
船行天上遊人散
樹沒雲中宿鳥回
一到便應離火宅
不須花雨拂經臺

提刑司封以鄰霄臺佳什垂示輒成拙篇以答厚
貺

峭拔幾千仞孤高無四鄰
低回傾北斗突兀起東閩
締

結青雲上登臨滄海濱溪山來面勢歌吹徹穹旻子夜

先看日陰崖後得春三韓空瑣碎

福人云高峰晴海見新羅州島

萬落

自埃塵使者風流在詩人格調新驪珠忽投我神筆動
驚人平昔持州契于今識路津去天知不遠咫尺仰威
神

過楊樂道宅西桃花盛開

城隈遶舍似山家舍下新桃已放花無限幽香風正好
不勝狂艷日初斜自憐馬上空愁望誰向樽前與醉誇

京國難逢春氣味莫隨塵事度年華

和龐公謝子魚荔枝

霜鱗分不登枯肆丹實全應勝木奴欲効野芹羞獻去
敢期佳什墜驪珠

宋宣獻公夫人畢氏哀詞二首

世閥推台路嬪賢秉國鈞生緣隨迹化歸處覺空真訓
子清風在傳家令德新九原終一致悲喜盡成塵

國賦雖千乘身期未百年歲圖遺舊机簫吹向新阡行

哭追前日超生定幾天寂寥原上樹薄晚起寒烟

和張唐公約遊名園遇雪輒止

京塵官事日區區擬出芳郊佩一壺樓外陰雲迎曉合
陌頭霏霰與風俱翩翩珍騎曾來否種種名花更在無
若得縱遊休秉燭月中沈醉倩人扶

和宋次道宴日不赴有懷

殿中佳氣帶春容天上雲謠落晚風獨向下陳露醉竿
羨君清卧寄詩筒

春日

東風吹雨濕鞦韆
紅點棠梨爛欲然
擬買芳華贈年少
紫榆春淺未成錢

唐公以公累出知濠州

湛湛清渠風力微
濠梁行客布帆歸
到官應過莊生廟
試問鷓鴣兩是非

桃李園

上有繁葩下落英
紅波動蕩逐風行
夕陽開處猶光艷

何況今宵值月明

送客來仙館清幽處處尋春風行酒面晝日到花心獨
厭歸期促難忘野意深歸鞍更回顧檜栢自陰森

三月出城別張唐公會玉仙觀

隴麥青青溝柳新春歸聚落少逢人如何試與持鞭手
拂却向來身上塵

玉仙池

洞府花飛不減春輕雲成片玉成塵香輶縹緲知何在

無限池頭再拜人

凝祥池上晚歸

綠徑陰陰落景微
楊花零亂上人衣
長烟似愛滄波面
風色雖豪不肯飛

和楊龍圖蘆鴈屏

何事高堂秋思生
野蘆寒鴈畫工精
風前挺立孤根老
雲外相從去意輕
不似丹青能借色
若逢霜月定聞聲
研桑心術都無取
回望江鄉計未成

和楊龍圖麋猿屏

畫莫難於工寫生麋猿移得上幽屏相逢平野初驚顧
共向薰風適性靈引子畫遊新草綠嘯羣時望故山青
可憐官省沈迷處每到中軒頓覺醒

和吳省副北軒湖山之什

誰於素壁寫江流雲樹疎疎映荻洲盡日清虛全却暑
一川搖落似經秋暫逢明畫心猶在終向扁舟老去休
只有遊鯈能自適莫懷香餌重遲留

送仲庶待制知澤州

十年臺省獻嘉謀
新總兵符鎮上遊
琴有薰絃多舜俗
地連沙尾舊湘州
江邊行色船千丈
塞外威聲馬萬頭
宣室夜談思賈誼
未應鄉國久遲留

送子真給事出守常山

安得長材護北州
暫煩儒將擁輕裘
聲名不啻一敵國
功業何須萬里侯
設館高牙延永晝
獵場飛騎入清秋
天樞嚴近恩榮重
歸夢應思帝所遊

送程刑部出守洪州

何事名郎出計臺
鍾陵都會久須才
江山不是人間有
旗鼓初從日下來
列郡五符歸總制
故鄉三組少徘徊
勿嗟南國多懷感
寶氣還應徹斗魁

端明集卷八

欽定四庫全書薈要卷一萬四千五百九

集部

端明集卷九

宋 蔡襄 撰

箴

進黼宸箴狀

右臣伏覩詔書宣諭三館臣僚或朝廷大事邊防機
宜許令密陳章疏或乞上殿敷奏者臣竊聞太宗皇
帝兵戎初定乃作三館購藏天下之書精選四方之
士仍於館下旁設便門或時臨幸或即召對故當時

之得失下民之利病多所推究而施行之真宗皇帝
屬世治平游意文藻詞臣之列嘗預詢訪於是天下
之人知備官禁闥者不獨繕討蠹書亦有以通上聽
而裨國治矣伏自陛下臨御以來嚮二十餘年未嘗
一至所增官屬準前數倍未嘗一召今者特布德音
開誘言議茲所以見陛下憂勤之至人人自力思竭
智慮以裨萬分之一臣愚不知陛下將以成好問之
名歟直欲擇至當之言而用之也臣智識蒙陋不敢

廣引古記多屬空文輒求于今要急之務而陛下之
所欲知者謹撰成黼宸箴一首書為兩軸每句之下
條陳事實別疏一通各隨狀上進臣聞唐太宗凡言
事有益於政者書之屋壁以為警戒伏惟陛下不以
臣之狂直而弃之幸置臣箴詞於戶牖間時賜省覽
原其所條事實終始則今安危之勢可見矣昔漢賈
誼論及時事以謂可為慟哭者以臣今日之心知古
人之言不虛謬矣干冒宸嚴無任戰汗之至謹具狀

奏聞謹奏

黼宸箴

丕顯元聖上奉天時躋俗於禮任材以宜肅治家政大
隆本支好問益廣去邪勿遲利急思困兵連慮危法令
必信恩賞無私威福是守聽斷不疑太平可致決所施
為

別疏

臣所進黼宸箴每句之下條陳事實於左

丕顯元聖上奉天時

臣愚淺不知陛下天下之造竊謂丕顯元聖上奉天時者以天人交感之應合若符券比年以來地震日蝕黑風災火變見之端可謂多矣臣謹按先賢所論地震者陰迫於陽也日食者陰薄於陽也黑風晝冥者陰盛於陽也災火者陰極於陽也如此之類皆陽不勝陰之所致矣陽者君象也陰者臣下也夷狄也婦女也今夷狄內侵則見之矣必有臣下潛弄威權

宮中多收冗列故上天再三警戒欲陛下思而革之
轉災為福也臣聞太祖撥五代之亂太宗平定天下
真宗思與百姓休息至於建立經久之業變更非便
之制將有待於陛下也陛下專政以來執議之臣謂
天下已安循襲舊常可以宴安而無虞矣不探根本
責事實今日夷狄侵侮生民重困豈非因循苟且之
患乎陛下以是觀之前日之失可知矣知前日之失
而又重於改作則後日之患將何如哉今政之弊僥

倖姑息寢以成俗矯此弊者非任誅賞考功實莫能
治之上無姑息下無僥倖則奸人無所容矣上天之
戒陛下非不切也陛下答天之意非不勤也每聽事
至日是而不食然皆有司奏覆細碎之務非天下之
治本伏惟陛下精久求弊不憚改作自總威令強陽
而抑陰自然天心悅豫而萬事舉矣

躋俗於禮

臣聞唐末強臣擅兵分裂疆土五代更易干戈日尋

上令急逼誅求無已百姓無聊不勝其弊奪攘苟活
父子之恩不能相保天下之俗不遵廉耻之節壞敗
爛熟莫知其非我宋之興一草海內休養生息四五
十年無甲兵之患民財贍足侈靡偷薄漸染成俗大
臣者天下之表也相競廣市田宅爭求重利況百官
哉況下民哉於是官吏曲獄受賄而抵死者案牘相
繼豪富之家狗馬婢妾無有制度縱欲相矜財所不
及者則極力為之恩義之薄而財利之厚上自大臣

下及黎庶莫不然也今兩制已上之官居父母喪許
不解職欲民興孝其可得乎近臣苟進黨附相傾百
官臣僚日相詆訐朝廷且爾欲民興讓其可得乎衣
冠之家至有父子相殘夫婦相剋且下民之愚尤可
怪駭況在仕官居民之上而悖戾至此禮義之列方
亦幾盡矣臣竊思其源蓋天下之治一斷於法法之
所禁或避之治民之吏知法而已義禮之方鉗口不
言誠有立經制興禮讓之士俗必指為閭誕然治天

下不由於禮者莫能至也伏惟陛下察俗薄惡擇任
賢材興立典制上下有節車服有序禮讓興行僭侈
衰息豈不盛哉臣之所言乍若高論復而思之甚易
行也

任材以宜

臣聞馭邦之大莫大於建官材有短長官有大小故
隨其所宜而任之則事無不舉矣臣以謂今日建官
之法為弊至深取之不程其材任之不稱其力因循

滋久莫之變更臣請畧條建官之弊大者有四一曰
材不稱官臣不敢備舉百官之不稱者借如兩府大
臣為陛下之股肱繫天下之輕重得人則治其失則
危今日之居是任者或以久次或以例遷久次謂累
年而至者
故張若谷以年老乞備政府例遷
者謂狀元及第數年便至卿相不計材能不考功
績攀緣而進即授以天下之柄幸而材賢則福及於
下苟非其材而使之制羣生扶持重器豈不過哉董
仲舒曰小材雖累日不失為小官大材雖未久不害

為輔相蓋論材與否也今用一不材則天下之人皆知輕視公相而有苟進之心願陛下熟思其奸邪與不材之人必速退之而忠直材賢之人必速進之救溺之勢不可緩也二曰官守不久借如三司使副判官皆專筦財利臺官諫臣糾正朝綱歲補時闕發運轉運使均輸徵賦廉察風俗列郡太守問民疾苦此皆至重之寄祖宗舊規率有年課今之除授但作踐歷資序內則踵跡相躡立登貴仕外則州郡迎送畧

無暇日其餘兩制兩省以上近侍之職循環迭取若探諸懷臣欲備舉則文繁乞陞下列向來所陳職局及陝西被兵州郡取二十年已來郡守每歲凡更幾人及侍從之臣凡歷數年因何功效致官至此則弊可知也三曰官少員多臣不知天下建官之數但覺員數多耳先朝樞密龍圖等學士及待制侍從之官蓋僅有焉今多者至十數而少者五七人三館職名以僥倖恩澤比前增倍又樞密院武臣審官院京朝

官三班院使臣流內選人授官之後伺候闕次近者
一年而遠者二年此皆入官之路不定員數紛紛冗
食可勝道哉四曰無功而賞今大臣兩省已上官南
郊及每年聖節各與一子官非時請乞不與數中轉
運使提典刑獄等率有郊恩例既以無功迭受恩賞
故邊上臣僚小有勞績便加官爵只務姑息蓋勢不
得不然自建官以來未有如斯之濫也京朝官三年
使臣五年並與磨勘遷官先朝名曰磨勘者蓋考功

過今但默默署名無他罪咎或貪墨未敗或都無課
最計年取進而至顯官因循之弊乃至於此大可嗟
也臣聞易之道窮則變變則通通則久若朝廷立官
之弊宜更變之則其道可久矣若夫設施之方陛下
倘賜允行臣當條列以聞

肅治家政

臣聞記曰正家而天下定聖人序詩以關雎為三百
篇之首在易家人曰婦子嘻嘻失家節也故正家之

道貴乎謹嚴以表天下太宗朝陳留尉上書乞減放
宮人太宗皇帝宣諭宰臣曰宮中不過三百人皆有
職事不可減也臣乞陛下以今日宮闈之數比先朝
凡多幾倍況又多取閭巷之人展轉給使遂至數多
此微賤之流素習鄙俚之事非能知禮度之節苟不
嚴肅泣之令其畏憚則易所謂失家節也自古嬪御
之多率皆無益而有損陳隋之失唐之中圯皆以婦
人也臣乞陛下特令揀放疎冗之列任其自安以全

天地生生之德庶天下之人上知陛下薄於自奉縱有率斂皆緣軍國所須不為無用之費也

大隆本支

臣聞三代以前分建親族以為諸侯及天子威令不行諸侯強盛戰攻攘奪兼并微弱秦始皇卒乘此勢以取天下懲前之弊罷侯置守子弟無尺土之封及一夫大呼破碎潰壞漢興鑒秦之孤分立宗族裂地廣大卒有七國之變其後用主父偃推恩之策藩戚

微弱王莽依外戚之權知劉氏力孤遂篡神器曹魏
翦弱親戚未幾而亡晉室分兵八王迭相攻奪以亡
天下唐興諸王出干民事分領兵柄明皇以臨淄王
勒兵入除內難及即位之後反疑骨肉諸王不令出
閣恩愛雖厚而實奪之勢安祿山之亂明皇幸蜀諸
王被害者甚衆德宗朱泚之亂宗枝畧盡故有百王
子家以其不可勝數也文宗嘗欲分遣宗室補除郡
吏向外婚嫁終以不斷事不果行及昭宗時韓建苞

藏禍心先奏諸王不合典兵請歸十六宅及與劉季
述同謀發兵圍十一王至石堤谷無問長幼盡殺之
朱全忠宴九王於九曲池殺而埋之於是唐之苗裔
盡矣而社稷隨之臣詳觀前古區處乖宜乃令至親
不相保養可為慟哭臣請論之三代分封五等相承
地小力薄雖強弱相并而周之年祚延及八百秦不
與子弟分封及其亂也無以繫天下之心纔傳三世
遂至移祀漢七國之亂由裂地過大晉八王之亂由

領兵大盛其亡也皆以宗族微弱唐室之制尤為失策幽閉宗族聚為一處百夫環之引首受戮豈不痛哉使文宗之計果行選擇賢材列補外郡當其亂時縱不能作勤王之師亦足以自為安全之計豈肯父子兄弟盡為魚肉乎況大盜之興如王室有維城盤石之固豈敢輕視而竊取哉伏惟陛下監前古成敗擇而行之

好問益廣

臣聞人主聰明莫不欲周於天下然有蔽於近者蓋
詢訪之弗廣耳竊聞民間之言以為西北二邊事宜
奏至左右近臣當對覆之時多小其事以為不足懼
其說則曰不欲陛下盡知慮貽主憂其實不欲陛下
盡知之耳陛下盡知則焦勞益深督責愈切當有成
效故特小其事以寬其責也臣輒陳人君之聰明而
興壅蔽而亡者願陛下省責鑒戒焉唐太宗著司門
式云其有無門籍人有急奏皆令監門司與他家引

奏我太祖手詔百僚許令專對陳論得失故當時號為英主而聲名垂於不朽皆廣聽而興也秦二世山東有反者而使者輒曰羣盜不足憂二世悅之常居宮中與趙高決事羣臣罕得進見及沛公兵數十萬至而二世乃驚秦之亡無救矣陳後主用沈客卿等但奏妓縱酒不輟隋軍下陳得其境上密啟猶有未開封者是二主豈欲自取危亡哉然託任非人而蔽蒙至此皆聽之不廣而已也伏惟陛下監前代之興

亡窮當今之事實或邊上大事不時盡聞則民間細
碎利害何由上達伏惟陛下視朝之暇許百僚專對
或召侍從之臣周詳辨論則古今成敗百姓冤隱安
邊之策富國之術不日悉陳於前矣

去邪勿遲

臣竊見陛下頻降詔書戒勅朋黨然未聞陛下決然
區別而去之臣聞君子以道相濟思進其類古人謂
禹稷皋陶轉相汲引不為比周至於小人以利相合

欺蒙險詖殘害忠良以危邦家故人主惡而去之也
去之之術在辨邪正二端耳唐李德裕對武宗曰正
人呼邪人固為邪矣邪人呼正人亦為邪矣何以辨
之譬如草木焉松栢孤生枝幹直上此正人也藤蘿
之性必須依倚乃能自守此邪人也其論甚明故人
主難辨者不察小人結附之因也臣竊謂結附之因
盖人主不自選任羣臣其進用之速者皆緣薦引不
考功察實權之所歸小人所聚一士獲進百人趨之

互相訾譽寢成黨與人主雖惡之已堅牢而難動矣
臣請陛下思之凡今左右近臣出聖慮自擢用者幾
人且擇兩府大臣必於兩制兩省之官陛下豈不思
其何所因緣而至於此苟不出於聖慮則其微賤時
已有結附之情及其近貴安能自去朋黨唐文宗謂
河北諸寇去之易而此朋黨去之至難臣竊不取夫
貴為天子持予敎殺生之柄而以去朋黨為至難乎
唐祚之衰矣夫去邪用正則安用邪去正則危邪正

參用則危伏願陛下明辨邪正之端正則用之勿疑
邪則去之勿遲苟以邪正參用而治天下者譬猶耕
石田而待稔也

利急思困

臣聞為天下者欲天下之財非以自奉將以致天下
之安也故財有常入亦有常出下堪其力雖輸而不
怨上無所私雖用而不濫當其無事之時供億恒足
雖有兵戎水旱之患無窮之用不致懸釜掣肘有如

五代弊病之餘攻戰未已外內兵食猶且思蓄羨財
以贖中國男女沒虜者以歸流徙者以定而仁心之
洽著民骨髓我太宗一統方內綱紀天下之賦於是
天下之民賴焉有司嘗擬毀棄弊

闕

令

滌染合作諸軍旗旛數千種蓋我祖宗踐歷艱難周
悉民人之苦故尺帛斗粟不虛費也陛下垂統幾二
十年乃者邊陲無患用度差廣民言籍籍皆謂祖宗
積聚之餘多入幸臣之家及西寇干紀隨急配遣天

下騷然一隅之動其勞且爾況有大於此乎三司筦
天下之利而使副判官纔至又遷簿書首尾尚未能
通曉所言目前細碎誅剥之事以自塞責豈肯為父
計而興大利臣竊見唐陸贄論德宗遷幸之由其畧
曰常賦不足即令促限又使別配設筦權之科行貸
商之法閭私牧取馬責將家出兵主第王侯咸輸屋
稅裨販夫婦畢算緡錢一旦盜興用以藉口臣竊思
兵興以來贄所陳之事稍稍施行矣今戍兵益衆供

饋益多後日誅求勢必愈甚時不幸有旱澇之災百姓貧困柰何救之古者大盜之興皆緣饑旱不足因民之怨求國之隙以為凶亂朱泚入長安令曰吾不私汝間架矣皆取利太深而招怨亂矣近者陛下鑒祖宗儉約之德懲既往虛費之失持今日節減之制不為左右干請而移之宮中非時賜與非今之制者一切不行念生民之勞戒誅剝之令則天下幸甚幸甚

兵連慮危

臣竊以國家自北戎繼好以來大弛武備號曰禁軍者日享厚給驕蹇難用前日魏府之兵是也曰廂軍者例充給役刀矛戟矢畧未知名自西羌悖戾征戍屢興再戰再衄覆軍殺將其故何哉臣謂處將乖宜練軍不實官名不正之所致也處將乖宜者其弊有二一曰將權不專借如諸路帥臣悉委都統之權朝廷每有宣命令與鈐轄都監巡檢從長商量或有便

宜主帥發謀則人人各出意見議論不一退則交相
笑病以此為謀安能決勝此皆將權不專之患也二
曰將官不久臣竊見陝西永興廊延環慶涇原被邊
之郡主帥更易不常一歲之間換三五人者為上者
不久處不肯奮然專行法令居其下者皆知莫能久
為我帥不肯稟畏故上下之情不通而誅賞之法不
行此將官不久之患也練軍不實者養無用之兵致
難供饋今邊郡禦戍之兵非人人可戰朝廷遂急招

募据名抽點務為多數邊臣但苦兵寡不計強懦至則收之以是度之冗食者不得勝數也唐方鎮之兵不出征討則以本道租賦自贍故選練至精可戰則食食則無不可戰之人也我太祖太宗朝四方未一用李漢超何繼筠治滄棣北備匈奴用郭進守邢州以杆河東於是下蜀取交廣當時西北則守東南則攻用兵之處比今倍多其時圻甸未廣租賦未豐其饋兵軍常足也今天下一統兵戍比於西北二陲而

賦稅百事十倍於當時而常苦兵少及饋運之不繼
何也蓋當時用兵之處雖多而所用之兵養薄而藝
精藝精則用不必多養薄則易於供饋今之兵卒多
求上軍投者即收之不暇惜費今之一卒可贍昔之
三人又藝能不精愈多愈敗此所以兵多而難贍臣
故曰養無用之卒也三曰官多不正借如諸路帥臣
其官以都部署安撫經畧招討為名是委以都統之
權其將佐曰副都部署鈐轄都監監押等均作賓禮

見主帥至於分管兵馬自為部分非如軍職節級相

轄唯主帥則部管之蓋以都監之名本是監軍自餘

殿直諸司使副皆是內庭之官若令軍禮見主帥則

於禮不安若令不相統帥又不可成軍臣故謂官名

不正也為今之策臣請改正官名每路立成一軍如

都監之類盡改軍職

如遊變排陣之名也

節級相轄一以軍法

從事如違犯並依階級條貫施行官名既正則將權

可專將權可專則練軍必實練軍必實則所用之兵

必寡所用之兵必寡則易於供饋以守則固以戰則
勝或朝廷疑其成軍之後其力難制則事平之日分
散其權可也于今之計非成軍則無有成功其勢不
得不然西寇干紀已歷四年未即誅翦今不早圖改
變設使幽薊少警將何以待之臣故曰兵連慮危者
以此

法令必信

臣聞管子曰國之重莫重於令令重則君尊君尊則

國安故虧令益令留令非令四者皆死無赦是知令之不便不可遽行令之既便不可遽更人君持此柄以運天下者也今朝廷每下詔令尋即變更士民相語期以非久州縣之吏不敢遵行臣請以一事質之自西兵以來陝西科民為兵京東京西百姓驚擾至於斷指薰目以期苟免其時詔書布喻安慰京東京西之民示不復黥為鄉兵今又籍之矣又陝西河北初點為鄉兵詔書諭以防守城池不復黥墨今又點

黥手黥面矣此皆朝廷發大號令告于四方丁寧切
至乃首尾相戾如此使民何所取信哉今已樞密張
觀邊臣趙振等數人皆以軍事不前責降曾未踰年
加恩牽復始者無過則不應譴責若其有過不應寬
假為令若此欲百官畏服萬民信順難矣願陛下少
紆聖慮思其紛紛更變之端前令之是則後令之非
後令之是則前令之非察其是非謹於出令則朝廷
尊而天下安矣唐文宗曰為政之道自古所難宰臣

李石曰朝廷法令必信則不難也則知古之君臣皆以法令為重非臣徒為空論耳幸陛下留意焉

恩賞無私

臣聞天下之道不私於物其所以生而所以殺者萬物無從而歸其所宰故天之道至大矣聖人法天以至公令天下功則賞過則罰無私焉萬民服矣朝廷於賞罰之柄有無功而賞者有過而失罰者臣於前篇論之詳矣然罰不行而賞太過此乃立法之弊非

陛下之私也臣所謂私者竊聞頃年有勅旨停罷內
降今又行之大凡恩賞固當出於陛下之所決若罷
之則是人主都無威權盡出臣下此則不可也然今
之內降或緣婦謁內戚宮中因依僥倖苟求恩寵非
陛下擢用英豪旌錄功績故每有內降恩澤人或疑
之執政之臣又不能堅持正論以輔盛德徒欲阿順
主意不謂於陛下無益也古者水旱不時人君親於
南郊以六事自責曰婦謁盛歟苞苴行歟故婦謁之

盛苞苴之行古之深戒今僥倖內降者苟非親戚必
因貨賂然後乃請若陛下從而行之是示天下以私
也唐中宗朝宮掖不肅嬪嬙左右出入無節遂至廣
納貨賂別降墨勅斜封授官臧獲屠販之類累居榮
秩卒為禍亂此前世之鑒伏惟陛下總攬威權抑去
私請苟用一賢人出陛下之意雖曰有內降百官萬
民相與稱道之不暇孰敢非議也

威福是守

臣聞老聃曰魚不可脫於淵國之利器不可以示人
為人君者深知此務則威福之柄臣下不可得而竊
之也威者兵刑而福者恩賞之謂是二者有一失而
得於下者其國必危有公然而假於下者國必亡三
代之末齊假於田常晉假於六卿以取其國秦假於
趙高而天下潰漢假於外戚而王莽作東京假於強
臣而曹丕立魏假於司馬而移祀晉假八王而兵亂
宋齊梁皆假於大臣而相繼攘奪唐之中世假於宦

官而宮闈禍起此皆人主不自總攬威福而假於下
卒至危亡故兵刑官賞之柄雖大臣外戚宗族宦官
皆不可假假之則人主失其操持而自取危殆也臣
竊見數年以來兩府兩省之官遷轉甚速雖曰循例
不限年數趨利之弊日繇權勢獲進者自為私恩而
罷者歸怨於上臣恐恩賞之柄暗行於下也臣請以
一事言之今陛下少有差失之舉則羣臣莫不交口
議論期於諫止而大臣權貴之過少有肯言者何哉

陛下天慈仁恕每有言事者雖上論聖德然未嘗怒
之或論及權臣苟不顯行譴謫則亦陰被退抑而嚮
之者皆與進用臣恐大臣權貴之過陛下罕得而知
也以此觀之臣下之威過於主上主上之恩行於臣
下其勢顛倒未為得也伏惟陛下躬持兵刑官賞之
柄以治天下則百官歸而恩信行矣

聽斷不疑

臣聞聽與斷二者相資而終始之者也聽者取於衆

言者所見不同或懷私背公或阿順主意故是非紛糾所以人主但務博采兼容而要之斷也斷之為義時有緩速而理有得失違於理而失於時無術之甚也有中於理而失於時或適於時而違於理其為患也亦均矣唯適於時而中於理乃曰善斷故聽之道務廣不廣則壅斷之道務審不審則移唯天心仁德者善聽唯剛果明辨者善斷故曰聽與斷相資而終始者也伏惟陛下天仁洪覆包容萬類每日臣僚論

事陛下未嘗不欣納假以溫言使之得盡其說可謂
善聽矣然採於衆言時有更易不決然主於斷也臣
愚善度天心非不勝斷所以未至於斷者蓋慮或有
未審故優游不盡斷之道臣竊謂欲斷之審莫若
頻延近侍講議禮要廣接羣臣詢訪時事聰明益至
處置自精何患斷之不審也易曰天行健君子自強
不息聖人法天以剛健決物伏惟陛下法乾剛之道
專決斷之明臨事不疑大隆治道蠹爾小寇復何患

乎在陛下力行而已

太平可致決所施為

臣聞易曰危者安其位也蓋安危之理無有定分在人君之所為國危而為安者自古多矣朝廷自用兵已來屢下詔書詢訪材謀魁傑之士或令近侍各舉所知收用雖久未聞功績灼然者將任之不盡其材歟抑天下無可任者歟謂之無賢材則厚誣於世矣漢之興驅馭英雄以成大業皆秦之遺士也唐之興

取隋之棄人以安天下故賢者無世無之顧取之用
之之道如何爾陛下當三聖之統紹祖宗之業宇內
之廣生民之衆莫不傾心以期太平願陛下勞於求
賢而佚於任使修明紀綱興行禮教則太平之治其
猶指諸掌乎右臣謹具如前臣奉詔旨許令言朝廷
大事邊防機宜所以竭思畢慮論當今之要務伏惟
陛下寬恕狂愚特貸誅夷之罪或賜施行又慮臣文
字昧暗事理未明臣上殿之時乞賜清問庶盡臣懇

懇之至于冒天慈臣無任戰懼之至謹具狀奏聞伏
候勅旨

端明集卷九

謹案卷七第十二頁後四行極峻只疑天上逼刊
本逼訛黨據別本改

卷八第四頁後三行安靜堂庭松刊本作庭松安
靜堂據別本改


第六頁前八行福州乃泉之轄刊本泉訛象據別
本改

卷九第三頁前四行變見之端刊本端訛詳據別
本改

第九頁後三行唐興諸王出干民事刊本干訛於

據別本改





總校官庶吉士臣張能照
校對官助教臣黃昌禔
謄錄舉人臣周克鵬